

Regla di maneho di prioridat den investigashon di kumplimentu pa Fair Trade Authority Curaçao

Regla di maneho conforme artíkulo 2.16 di Ordenansa Nashonal enkuanto Kompetensia pa loke ta trata stipulashon di prioridat den investigashon di kumplimentu pa Fair Trade Authority Curaçao.

20 di mart 2020

Introdukshon

Fair Trade Authority Curaçao (FTAC) ta risibí mas keho i indikashon tokante posibel violashon di e Ordenansa Nashonal enkuanto Kompetensia, di loke su kapasidat di investigashon por akapará. Pa e motibu akí ta nesesario pa FTAC skohe kua indikashon i keho e lo investigá. E eskohonan akí FTAC ta hasi a base di un maneho di prioridat.

Den e konteksto akí FTAC ta komprondé bou di keho, un petishon pa proseder den kumplimentu di lei. Den kaso ku no ta trata di un petishon pa proseder den kumplimentu di lei, FTAC ta konsiderá esaki un indikashon. Na momento ku FTAC risibí un keho, e ta kontrolá promé si realmente mester konsiderá e keho komo un petishon pa proseder den kumplimentu di lei manera fihá den e Ordenansa Nashonal enkuanto Kompetensia. Pa e motibu akí ta na promé lugá determinante si e esun ku ta entregá keho ta esun ku ta benefisiá den sentido di artíkulo 1.1. e. di Ordenansa Nashonal enkuanto Kompetensia. Na di dos lugá e keho mester kumpli ku e eksigensianan ku e Ordenansa Desishon Hurídiko Atministrativo (*Landsverordening Atministratieve Rechtspraak* - LAR) ta pone pa e petishon. E eksigensianan akí ta bini bèk den e formulario “Keho tokante posibel violashon di prohibishon di formashon kartel òf mal uso di posishon di poder ekonómiko” ku FTAC a stipulá pa entrega di keho. Seguidamente FTAC ta investigá basá riba e maneho di prioridat si mester duna prioridat na e investigashon di e keho, konsiderando e kapasidat di investigashon disponibel.

Aki bou, FTAC ta elaborá riba e puntonan di salida di nan maneho di prioridat.

Kriterio di prioridat di FTAC

Basá riba e siguiente preguntanan, FTAC ta definí prioridat di un investigashon di un keho tokante posibel violashon:

- Kiko ta e grado di interes di e konsumidó envolví den e posibel violashon?
- Kiko ta e grado di interes ekonómiko i sosial envolví den e posibel violashon?
- FTAC su proseder kontra posibel violashon ta efektivu i efisiente?

Na momento di pone den balansa e interesnan mutuo, FTAC ta apliká komo punto di salida ku na promé lugá ta sirbi interes general di e konsumidó. Ademas, FTAC ta tene kuenta ku e sektor- òf áreanan di atenshon ku ta mensioná den FTAC su agènda anual. Tambe FTAC ta konsiderá na momento di evaluashon di prioridat di un investigashon interes personal di e solisitante embolbí.

Den kaso ku e kontesta riba un òf mas di e preguntanan ariba mensioná i peso di interes ta hiba na e konklushon ku un investigashon mas detayá di e keho no tin prioridat, FTAC lo rechasá e petishon basá riba e falta aki.

Interes di konsumidó

Pa kontestá e pregunta relashoná ku e grado di interes di e konsumidó envolví, FTAC ta eksplorá si e posibel violashon ta afektá e konsumidó direktamente òf indirektamente. Esaki por ta e kaso por ehèmpel na momento ku e posibel violashon ta kondusí na preis mas haltu, limitashon di posibilidat di eskoho òf kondishon pa e konsumidó òf kalidat inferior.

Interes ekonómiko i sosial

Pa kontestá e pregunta relashoná ku e grado di interes ekonómiko i sosial envolví, FTAC ta eksplorá efekto di e posibel violashon riba ekonomia di Kòrsou den su totalidat i e efekto riba e funshonamentu sosial na Kòrsou.

FTAC ta eksplorá e efekto ekonómiko pa medio di balotashon di e posibel violashon riba e merkadonan envolví. Si resultá for di esaki ku e embergadura ta relativamente chikí, e ora ei e impakto riba ekonomia di Kòrsou en prinsipio

tambe lo ta chikí. Si e embergadura ta relativamente grandi, FTAC ta hasi un balotashon di e impakto di e posibel violashon riba e merkado ku ta relevante pa Kòrsou.

FTAC ta eksplorá efekto di funshonamentu di sosiedat pa medio di balotashon di efekto di e posibel violashon riba funshonamentu diario di komunidad di Kòrsou riba e merkado(nan) involví. Sin ke kai den ripitishon, esaki por resultá di ta e kaso di sierto violashon den e sektornan manera di suministro di elektrisidat, kuido, telekomunikashon i instansia di servisio finansiero.

Efektividat i efisiensia

Pa kontestá e pregunta si un investigashon di FTAC kontra posibel violashon ta efektivu, ta eksplorá si tin probabilidad ku despues ku FTAC hasi un investigashon ekstensu lo por determiná ku tin un infrakshon i por terminá esaki. Huntu ku esaki ta tene kuenta ku e eksigensianan ku derecho atministrativo i hurisdikshon ta fiha na FTAC su proseder den kumplimentu di lei. Den kaso ku basá riba investigashon lo por determiná un violashon, FTAC ta husga na ki manera lo por terminá definitivamente e posibel violashon i e konsekuensianan negativo di esaki.

Pa kontestá e pregunta si un investigashon di FTAC kontra posibel violashon ta efisiente, FTAC ta wak promé si nan ta e instansia (gubernamental) mas indiká pa aktua. Por ta posibel, por ehèmpel, mas efektivu basá riba índole di e keho, pa laga un otro supervisor investigá e keho, komo ku e tin mas outoridat investigativo. Esaki ta inkluí e posibilidat ku esun ku ta entregá e keho ta pone fin na e violashon via di un otro instansia ku no ta FTAC. Den sierto kaso un hues sivil por ta e instansia mas indiká. Den esei FTAC ta tene kuenta si ku funshon di esun ku ta entregá e keho. Na di dos lugá FTAC ta hasi un balotashon di e medionan ku ta nesario pa determiná i terminá ku e violashon. Na momentu ku tin mester di mas medio, generalmente e proseder di FTAC lo ta ménos efikas.

Aplikashon di kriterio di prioridat i responsabilisashon

Manera indiká, FTAC ta risibí mas keho i indikashon ku nan por investigá basá riba nan kapasidat di investigashon. Pa e motibu akí no por investigá tur keho i indikashon. Pa pèrkurá ku FTAC semper ta kuminsá ku e investigashonnan di mas importante nan ta traha, basá riba e preguntanan ariba menshoná, un análisis di e keho i indikashon ku a drenta. Ku esaki FTAC ta logra balansá prioridat di tur investigashon (ofisial) basá riba indikashon i basá riba keho ku otro. E análisis akí no ta un ehersisio aritmético i e aklarashon anteriormente menshoná no ta limitativo. Por presentá situashon ku den e parti ariba no ta elaborá, pero ku por hunga un ròl na momento di evaluashon di ki prioridat mester duna un investigashon. FTAC lo responsabilisá su mes pa esaki. FTAC ta para responsabel pa e manera ku nan ta pone nan prioridatnan den kada desishon individual – i mas en general – den nan relato anual. Den kaso ku rechasá un keho pa motibu di falta di prioridat, FTAC lo indiká dikun nan no a konsiderá oportuno pa usa nan kapasidat di investigashon relashoná ku e keho teniendo kuenta ku e kriterionan di prioridat. Ta publiká e desishon akí.

Willemstad, .. di mart 2020

Fair Trade Authority Curaçao,

Dhr. Rob van der Bergh, presidente interino FTAC